



## **Memoria xustificativa do convenio de colaboración entre a entidade pública empresarial Augas de Galicia, o Concello da Coruña e a Empresa municipal Aguas de A Coruña, S.A. (EMALCSA) para a xestión e explotación da presa e encoro de Cecebre**

### **1 Antecedentes**

O 28 de agosto de 2012 asinouse un convenio de colaboración entre a entidade pública empresarial Augas de Galicia, o Concello da Coruña e a Empresa Municipal Aguas de A Coruña, SA (EMALCSA) para a xestión e explotación da presa e encoro de Cecebre.

A cláusula décimo primeira do convenio subscrito recolle que este ten unha duración coincidente co período da vixencia da concesión outorgada ao Concello da Coruña por resolución da Dirección Xeral de Obras Públicas do Ministerio de Obras Públicas, do 27 de outubro de 1973, quedando supeditado o prazo do convenio a calquera modificación que puidera supoñer unha variación do período concesional previsto.

O artigo 49.h).1ª da Lei 40/2015, do 1 de outubro, do réxime xurídico do sector público dispón que os convenios deberán ter unha duración determinada, que non poderá ser superior a catro anos, salvo que normativamente se prevea un prazo superior.

### **2. Obxectivos que se pretenden**

As partes consideran necesario formalizar un novo convenio de colaboración para actualizar o seu contido e adaptalo deste xeito á regulación en materia de convenios que establece a Lei 40/2015, do 1 de outubro, citada así como á normativa vixente en materia de protección de datos persoais e publicidade.

O obxecto do convenio é regular e formalizar os compromisos que asumen a entidade pública empresarial Augas de Galicia e o Concello da Coruña e a Empresa Municipal de Aguas de La Coruña, S.A. (EMALCSA), necesarios para levar a cabo unha correcta xestión, explotación, conservación e mantemento da presa e encoro de Cecebre.

### **3. Necesidade da colaboración, razóns de oportunidade e xustificación da non concorrencia**

A entidade pública empresarial Augas de Galicia, adscrita á Consellería de Infraestruturas e Mobilidade da Xunta de Galicia é o ente do sector público autonómico galego ao que lle corresponde exercer as competencias e funcións en materia de auga e obras hidráulicas nos termos establecidos na Lei 9/2010, do 4 de novembro, de augas de Galicia e no Decreto 32/2012, do 12 de xaneiro, polo que se aproba o Estatuto desta entidade.

O concello da Coruña, de acordo co artigo 25 da Lei 7/1985, do 2 de abril, reguladora das Bases do Réxime Local, ten atribuídas as competencias en materia do subministro de auga, debendo prestar, entre outros, de conformidade co artigo 26 desta Lei, o servizo de abastecemento domiciliario de auga potable.

O artigo 85 desta Lei reguladora das Bases do Réxime Local, habilita para a xestión dos servizos da competencia local mediante algunha das seguintes formas que nel se sinalan:

“A. Gestión directa:

- a) Gestión por la propia entidad local.
- b) Organismo autónomo local.
- c) Entidad pública empresarial local.
- d) Sociedad mercantil local, cuyo capital social sea de titularidad pública.





B. Gestión indirecta, mediante las distintas formas previstas para el contrato de gestión de servicios públicos en la Ley de Contratos del Sector Público”.

A Empresa Municipal de Aguas de La Coruña, SA é unha sociedade mercantil propiedade do Concello da Coruña cuxo obxecto social é, entre outros, a prestación do servizo de abastecemento de auga potable.

O Concello da Coruña é o titular da concesión de augas outorgada mediante resolución de data 24 de setembro de 1973, pola Dirección Xeral de Obras Públicas do Ministerio de Obras Públicas, de 928 l/s de caudal, a captar dos ríos Mero e Barcés, nos termos municipais de Abegondo, Cambre e outros, mediante a construción dun encoro no lugar de Cecebre, con destino á ampliación do abastecemento da poboación.

A antedita concesión materializouse na construción da presa de Cecebre, situada na confluencia dos ríos Mero e Barcés, no termo municipal de Cambre, e do encoro de Cecebre, situado nos concellos de Carral, Betanzos e principalmente Abegondo, sendo o abastecemento de auga ao Concello da Coruña cos recursos hidráulicos dos citados ríos Mero e Barcés o que motivou a creación desta infraestrutura hidráulica.

De conformidade co establecido no Real Decreto 2792/1986, do 30 de decembro, sobre traspaso de funcións e servizos da Administración do Estado á Comunidade Autónoma de Galicia en materia de obras hidráulicas, esta Comunidade subrogouse nos dereitos e obrigas do Estado en relación coas obras e instalacións hidráulicas que se relacionan nos anexos desta norma de traspaso. Así, as obras e instalacións derivadas da concesión hidráulica do encoro de Cecebre con destino a abastecemento de poboación foron entregados á Comunidade Autónoma de Galicia, de acordo co apartado e) do anexo I do Real Decreto relativo aos bens, dereitos e obrigas que se traspasan.

Por todo o exposto, a entidade pública empresarial Augas de Galicia, o Concello da Coruña e a Empresa Municipal de Aguas de A Coruña, S.A. (EMALCSA), en atención ás súas competencias e obrigas, e conscientes da necesidade de conseguir unha correcta e axeitada xestión e explotación desta presa, de xeito que se garanta o seu bo funcionamento e a seguridade da mesma, tanto en situacións normais como extraordinarias, consideran conveniente a formalización dun novo Convenio que regule as relacións que os vinculan en base ás súas competencias e funcións respecto da xestión, explotación, conservación e mantemento da presa e encoro de Cecebre, adaptándose a nova regulación relativa aos convenio dada pola Lei 40/2015, do 1 de outubro, do réxime xurídico do sector público, así como á normativa vixente en materia de protección de datos persoais e publicidade.

Para a tramitación deste convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

#### **4. Estimación de custos e financiamento**

Augas de Galicia non asume ningunha obriga de contido económico coa formalización deste convenio.

Santiago de Compostela  
A directora de Augas de Galicia  
Teresa María Gutiérrez López  
(documento asinado dixitalmente)

